

歷代貢舉志

明 秀水馮夢禎開之著

貢舉之有科目蓋未之前聞也雖周曰三物曰四術曰九年大成試之似有定塗曰選士曰俊士曰造士曰進士取之似有定序曰論定曰任官曰位定用之似有定制大都極其詳慎若此而賓興而拜受又極其隆重若此初未以一定科目薄試于始厚任于終賤視于先尊顯于後若今茲也秦稱虜用其士而仕進之塗闢田勝敵之外無多寄徑焉漢初詔賢士大夫既與我定有天

學海類編 卷之五  
下而不與吾共安利之可乎郡守身自勸遣嗣是詔孝  
悌復一身置官二千石建元初詔天下舉賢良方正直  
言極諫之士以董仲舒請令郡國歲舉孝廉限以四科  
一曰德行高妙志節清白二曰學通行修經中博士三  
曰明習法令足以決疑能按章覆文中御史四曰剛毅  
多略遭事不惑明足決斷材任三輔縣令元光五年徵  
吏人有明當世之務習先聖之術者縣次給食令與計  
偕元朔初天下謹法莫敢謬舉而貢士蓋鮮故又詔中  
二千石及禮官博士議不舉者罪郡國乃於屬僚部人

之賢舉爲秀才廉吏貢于王庭多拜爲郎居三署無常  
員而公車徵起者悉在焉元封五年詔州縣察吏人有  
茂材異等可爲將相及使絕國者元朔五年詔二千石  
謹察可者常與計偕詣太常得受業如弟子其高第可  
以爲郎中者太常籍奏始元初遣王平輩持節郡國舉  
賢良本始後王吉請明選求賢除任子弟之令永光初  
詔丞相御史舉質朴重厚退遜有行者光祿歲以此科  
第郎從官王莽時太常歲課甲科爲郎中乙科爲太子  
舍人丙科爲文學掌故後漢建武閒詔舉茂才廉吏三



公而下其數有差于時進用加以歲月先後之次且卒焉持拜不復簡試故謗議紛起良以士多矯飾也建初初復用故事以四科辟士永建後又增甲乙科左雄議改察舉之制胡廣輩不能駁其議張衡輩不能復其試得黃瓊爲尙書令乃以雄所上孝廉之選專用儒學文吏於取士之術猶有所遺乃奏增孝悌及能從政者爲四科建和永壽閒試用諸生大率以占第上下通經多寡限以三互自生畱闕建甯閒試甲乙科爭第高下中有賄賂改蘭臺漆書之經以合其私文者則詔諸儒讎

定五經蔡邕篆隸鐫石于太學謂之石經有以也科目昉于漢者若此然士之中猶多以鄉人勸勉而恥急于自進焉漢以降魏雖有除限年之制令郡國貢舉勿拘老幼儒通經術吏達文法則皆試用古雖有除九品之請復古鄉舉里選之法祛今八損三難之弊蕭齊取盈于五通元魏求多于三清卒之增年矯貌扳援奔競浸浸成風不可遏抑良以貢舉者循名遺實而應舉者務華絕根也隋初以志行修謹清平幹濟之科舉人至煬帝好文詞始置進士科專詩賦取士不復闕行能貢舉



之弊弊無以復矣唐仍隋上郡歲舉三人中郡二人下郡一人有才能者無常數其由學館貢者曰生徒由州縣舉者曰鄉貢皆升于考功而進退之其科之目曰秀才曰明經曰進士曰明德曰書曰算各依所習業舉選以爲常其天子自策舉之曰制舉以待非常之士諸鄉貢懷牒自列於州縣試已取文優者長吏以鄉飲酒禮會屬僚陳俎豆備管絃牲用少牢歌鹿鳴之詩與耆艾敘長幼賓興焉於是疏名列結通保上戶部戶部集閱而闕考功考功員外郎試其貢舉校試之失者皆有罰

初秀才科最高試策五條有上上上中上上下中上凡四等後廢而進士科特重然專之文辭他制科名如道侔伊呂才膺管樂志烈秋霜文經邦國辭標文苑臨難不顧徇節甯邦長才廣度沈跡下僚樂道安貧及賢良方正博學宏辭等科免絲燕麥徒擁空名而已貞觀閒詔加進士試讀經史一部調露閒奏加帖經兼通老子孝經永隆閒詔試文兩篇識文律然後試策載初初以策問貢人數日方了改試殿前自此始長壽閒令舉人獻歲元會列于方物前以備充庭又製臣軌兩篇貢舉習



學海類編 卷五  
業停老子神龍閒貢舉人仍習老子停臣軌開元閒司  
業李元瓘言三禮三傳及毛詩尙書周易諸經竝聖賢  
微旨生人教業周禮經邦之軌則儀禮莊敬之楷模公  
羊穀梁歷代崇習今兩監及州縣以獨學無友四經殆  
絕請令學生量配作業貢人參試又新注老子成詔貢  
士減尙書論語策而加老子會考功員外郎不稱爲士  
所詆訶朝議以郎官地輕移知貢舉於禮部侍郎禮部  
選士自此始天寶中帝欲盡官天下材命通一藝以上  
咸詣京師策之和李林甫專恣患草野士倨侮得斥言

其姦請令尙書省先試無一人及第者而林甫以野無  
遺賢表賀時中丞倚得幸帝侍郎宋遙苗晉卿欲附之  
以倚子爽爲舉首羣議沸騰帝召面試爽手試卷終日  
不成一字遙晉卿坐貶官其後有司鈎校爭苛切爲公  
水炭脂炬饗餼皆士人自將羅棘遮截始唱名入列坐  
廡下士益浮賤禮部侍郎楊綰患之上貢舉議大都以  
舉人幼而就學止誦當代之詩長而博文不過諸家之  
集遽相黨與用宏虛聲六經二史皆同掛壁投刺干謁  
馳騫要津無論孔門君子之儒非所彷彿卽漢之賢良



方正必不出此請依古側席之求罷今將牒之舉縣令  
察孝廉審舉其有孝弟忠信禮義之行加以經業才堪  
策試者以孝廉爲名薦之州州刺史禮侍之試其所通  
之經學通者上第上之省皆毋得輒自陳牒其所習經  
周易毛詩儀禮周禮禮記左氏公穀任科一經務取深  
義奧旨通諸家之學者至京遣諸司官有儒學者主試  
每經問義十條已對策策三問問古之治體及時務所  
施行者全通爲上第付吏部授官經通八策通二爲中  
第與出身下第罷歸諸明經帖括非古制請與進士並

停其國子舉人類此左丞賈至議大都以晉後衣冠遷  
徙人多僑寓於所在占籍必舉之鄉不足以盡材請增  
國子博士員十道及諸大州各設學致生徒其在桑梓  
者鄉里舉之在流寓者庠序推焉然終未兪行丞相鄭  
覃請罷進士之科李德裕稍殺進士之禮蓋唐末進士  
科浮薄滋甚誠如舒元輿言進士科公卿大夫皆由此  
塗出今有司坐舉子于寒廡冷地比僕隸已下非所以  
徵賢之意也施棘圍以截遮是疑之以賊姦徒黨非所  
以示忠直之節也試甲賦律詩是待之以雕蟲小技非



所以觀人文化成之道也恐賢人君子遠去不肯污辱  
爲國家用矣貢舉委地弊且不可收拾也宋初一時風  
氣樵樸人不知學問不願仕宦太祖置賢良若經學若  
吏理凡三科不限資而郡縣無應令者又許詣闕自薦  
對制策不稱又詔察孝弟力田若奇異若文武可任使  
者具送闕召試無可采乃而後復重科舉科制大都同  
唐而進士科亦特重又定渚州貢舉條法及殿最之式  
而川蜀所貢士令縣次往還續食以示優開寶初進士  
及第中有學士穀子邴命中書覆卷試且詔自今關食

祿之家得舉者悉以聞中書覆試其後學士昉知貢舉  
黜武濟川者以召問語失次且知爲昉鄉人也昉亦以  
親試諸進士落第者數十人坐黜始定進士廷試本于  
唐載初之改殿試也太宗時天下稍習文帝欲大興文  
治每謂侍臣曰朕欲博求俊彥于制科非敢望拔十得  
五但得一二焉可矣首設科張齊賢在試中顧不得第  
于是并呂蒙正以下竝賜及第賜宴袍笏賜詩賜禮記  
儒行篇命各以優等授官而進士恩禮之重不可上也  
其後舉多覆試哀十舉以上者特賜出身曰特奏名八



年始分甲賜宴瓊林苑雍熙二年詔今有以文學往復  
與吏爲奸者寘之于法以經義相教者元出科場又御  
試得梁顥等竝唱名及第淳化三年知貢舉蘇易簡始  
命糊名眞宗二年以溫仲舒言封印卷首仍當日入院  
又定廷試考第爲五等上二等曰及第三等曰出身四  
五等曰同進士出身八年始禁秉燭併制謄錄院易書  
天禧間舉人郭匿總麻喪殿三舉同保殿一舉祥符閒  
以貢院舉人解衣閱視慮挾藏書冊謂失士體欲止之  
而挾書扶出者最多得不爲禁乎仁宗時天下承平進

士額廣士驚浮文仲淹條議舉人皆捨大方而趨小道  
雖濟濟盈庭而才識學行之士十無一二請立州郡學  
舉通經有道之士專教授俾務于興行明理使人不溺  
于華藻又請外郡科解必履行無玷藝業及等者方許  
解薦更不彌封試卷其南省考試之人已經本鄉詢考  
方用彌封于時所禁有七而假戶冒名其二也宋祁上  
議詔州縣立學須在學三百日乃聽預鄉試試三場先  
策次論次詩賦通考爲去取而罷墨義張方平知貢舉  
又上言設科選士以文辭者誠謂其懷道義於中而英



華外溢叩其外而中之所蘊可質也言而不度將何觀焉邇文格日失其薦各出新意以相勝朝廷屢下書戒敕而學者罕能自還今賦或八百字論或千餘字策或置所問而妄肆胷臆驅扇浮薄用虧雅俗非取賢斂才備治具之意學士修知貢舉亦大以爲患也請寬期日試士試先策擇其蕪鄙不通者罷去畱者就試已乃定其去畱其後御邇英講周禮三年大比州里贊鄉大夫廢興喟然曰古選士如是今率四五歲一下詔故士有抑而不得進者令閒歲一貢舉進士諸科減解額之半

增明經科已復制科如賢能方正能正言極諫科博通墳典明於教化科才識兼茂明於體用科詳明吏理可使從政科識洞韜略運籌帷幄科軍謀宏遠材任邊寄科又置高蹈邱園沈淪草澤茂材異等科以待布衣之被舉者治平中議者以閒歲歲貢士法不便使士奔走道路無休息而不得游意于學詔三歲一貢舉定天下解額取未行閒歲法前四之三爲率明經諸科毋過貢士之數神宗初王安石柄國益厭唐詩賦取士之陋欲一之于經術乃言欲一道德在修學校欲修學校在審



貢舉而貢舉之法不可以不變今議進士科多得士非其科法善也士外此無繇進故其中豈容無正直之賢士少壯時正當講求天下之義理以經世乃閉門學作詩賦糜日月于空言及其人官於世務了無諳解此科法敗壞人才致不如古也於是罷明經諸科而進士科罷詩賦各占治詩書易周禮禮記兼以論語孟子每試四場初大經次兼經大義十道次論一首次策三道禮部試增二道中書撰義式頒行爲經義取士之始視詩賦稍近實主理義而舉士不於鄉不先於制行士終祿

利爲心莫能反其本也哲宗初司馬光柄國慨然欲盡官天下之材乃請自今設十科以舉士已又言神宗專用經義論策取士復先王令典但王安石不當以其一家私學盡廢前聞而錮之乃立經義詩賦兩科進士於易詩書周禮禮記春秋內聽習一經初試經次試賦試詩次論策末試子史時務凡專經進士須兼習兩經以四場通科其高下又請升朝官歲各薦州郡經明行修士一人以聞其預薦者不試州郡禮部試不第準特奏名得廷試出身其登第者得升甲風天下以敦士行



不專于文辭正言劉安世又以祖宗重館閣不輕授舉進士高第及大臣薦舉乃儲之禁密右地博之古今典籍優其廩餼而不責之吏事所以滋長德器有成其輔弼之具也望明詔執政詳求文學行誼可長育者召試以充母濫及非人知貢舉蘇軾孔文仲以特奏名命官者垂老無他望布列州縣惟務黷貨無一思自奮而有聞于時者願更加考選仍限名額毋使積弊皆從之於時積一治而紹聖崇甯盡焚燬以快忿而其時達官貴胄多得第上書獻賦頌者又得第闈梁師成用事隸其

家爲使臣爲小吏者畢賜第蕪濫至甚初祥符張士遜請主司親戚在進士中明當引試願出避嫌詔自今舉人與試官有親嫌者移試別頭景祐賈昌朝請隨侍遠地宜令運司類試乃詔諸路有別頭試咸平中取士甚多祥符中取士甚少嘉祐閒進士殿試不落一人治平閒進士分四等定三歲一舉貢舉疇不謂曲盡其制而不知弊至于宋洵滔天而不可涯測矣大抵自漢至隋惟孝廉秀才之科自隋唐至宋惟進士明經之科熙甯後安石以經義試進士則明經科廢而進士科獨行矣



進士輕干唐重于宋故今時稱宋進士爲將相科有以也 不知操觚末技得以階榮進之路則上所程者惟詞章下所習者亦惟口耳古選賢與能之意無復存焉者矣閒有張九齡之剛直吸噓雲雨顏真卿之忠義對越神明陸贄之論諫裴度之明哲蘇易簡王禹偁之知名李沆王曾之雅望寇準之峭直張詠之幹濟蔡齊之威儀韓琦楊寘范鎮之著節立身固皆不媿科名然韓愈名儒何蕃義士程頤理學石延年豪舉謂蓋代名流不第者又不勝識洵科主程詞本同射覆賢不肖亦惟

所中也彼舉科場條貫投地而不取者不有以哉我高皇帝設科廣求天下之賢應文學者察言行觀德考經術觀業試書筭觀能策經史時務觀幹濟洪武元年下求賢 詔三年下開科詔六年詔科舉取士終浮文罷不設十七年設科舉法命禮部頒科舉新式行焉已詔各布政司府州縣官舉秀才人材蓋科薦竝行也十九年詔郡國經明行修之士輪旌束帛交馳于四方初定金陵辟儒士范祖幹葉儀旣至訪道祖幹手大學以進曰具不出此書克婺州置行中書省召儒士許元



胡翰等日會食其中輪二人講經史治道克處州以書幣徵宿儒宋濂劉基章溢葉深以來命有司創禮賢館處焉晚徵耆儒崇德鮑恂上海全思誠安吉余詮高郵張長年命坐顧問命爲文華殿大學士恂等固辭乃賜勅禮遣之時孝廉人材及郡縣所貢士皆得見見稱旨卽擢不次而國子生奉命巡列郡廉官方吏治問民所疾苦還稱旨卽擢用爲行省參政僉事知府等官至有擢僉都御史者已制科舉諸民經宏詞等科並革存進士科舉與荐舉歲貢爲三途以並用三年大

比而賓興之其會試中式士

天子御正朝制策策焉又明日

上具皮弁服御正朝文武羣臣具朝服班侍臚傳賜

進士及第出身同進士出身各有差事訖羣臣前拜賀

辭曰天開文運賢俊登庸卽六卿宣宣制無是也故進

士科特重其會試不中式者送國子監肄業俟又舉

文皇帝言國惟求賢以資治理宵旰遑遑急於飢渴其

令內外諸司於羣臣百姓中堪重任而沈滯下僚堪劇

煩而優游散地抱道懷才而隱田野者各舉所知以名



聞母媚嫉母蔽賢母徇私監舉

昭皇帝首申重舉官之令謂天下之廣豈無皋夔顏曾之徒誠得一人可勝千百宜悉心訪之已命國子生有學行者十六人俾翰林嚴試拔其尤試六科尋擢爲給事中鄭府審理俞建輔言通賓興率馳騫于空文眞才鮮少有年未弱冠卽登第八官必有率意任情而民受其弊者令諸有司先審訪博古通今行止端重年二十五而上者方許入試比試則務選其典雅切實者進之會試益加重慎大學士楊士奇言北人文學遠不逮

南人然自古國家兼用南北士請自今卷首書南北二字如一科百人南取其六北取其四則南北士皆登用矣議定而

上賓宣德初乃奏行著令

章皇帝踐祚下求賢詔出御製漪蘭操招隱詩賜

大臣以風大臣奏舉賢能官者

上爲降辭色慰藉廷臣選懷無舉薦降勅責而司府

州縣官亦各得舉賢良方正一人上之部已合臨御

來三科進士試文華殿拔其尤授修撰編修評事等官



進學文淵閣優待之

睿皇帝復辟詔處士中有學貫天人才堪經濟隱居尚志不求聞達者具以聞

肅皇帝入承大統首言

祖宗朝雖定科舉歲貢之法而荐舉尤重以竝列于三途自科舉法行進士偏重舉人無九卿之望歲貢限方面之陞田野絕保舉之路以致人尚浮辭不修實行宜真才之不可見也務復科舉歲貢辟薦之舊 勅進士科文體毋浮冗必古雅精確制策往往親製知人哲于

放勳顓俊勤于神禹收攬人才不啻拔十得五其初政粹乎無議矣後或倦勤故崔銑有覆舉議曰昔成周之世聯之以比閭族黨教之以德行道藝正之司徒升之司寇六德爲本六行爲輔六藝爲翼無奇袤岐其心葺爾之國必有賢哲教之效也國家造士專用經術業易能不假深造仕易得不俟大成故士業經求仕鮮以提身舊法里老保其行試而升之學再保其行試而升之省是猶里選之遺也而久棄爲具文是上憑科舉曰付至公故試而得士若博之中呼其取之失人若奕之遭



學海類編 卷之三  
負何則非有參驗之詳觀考之素可賴也督學使者數  
歲一至事煩日寡無裕于施教故士以益荒宜歲令縣  
令察舉民年十五以上能通四書及占一經性行淳謹  
者上之守而登之學其輕狡者雖才不右督學官考校  
黜升之法必本之性行責之大守審驗當否而懲獎施  
焉閒有幸舉者不延矣陳建又言項安世云舉天下之  
才而一之于科目入是科者雖饕餮禱祀必用出是科  
者雖周公孔子必棄宜朱子以爲教愈詳取彌精澄汰  
再三而其具不越乎無用之空言愈弊無益也夫致治

以賢才爲本求才以興廉察孝爲先經曰居家理故治  
可移于官傳曰求忠臣于孝子之門此務本論也李克  
曰窮視其所不爲貧視其所不取此察廉方也蘇軾顧  
諱之曰上取孝則勇者割股怯者廬墓上察廉則敝車  
羸馬惡衣菲食苟可以中上者無不用夫上賢好德人  
之秉懿上好下甚王治之大綏也上誠敦篤尙行爲天  
下先而執此之政如金石四時堅久不易則天下之士  
爭自刮磨舉人者求無負于知人舉於人者求無負于  
所舉縱其有好名徇私之流殆其鮮矣况好名而矯于



善不猶愈于好名而肆于惡耶且天下固未有無弊之法也然薦舉之取士也擇而後用其失也一二科舉之取士也用而後擇其失也八九謂宜特設孝廉一科取行著鄉閭學通經史博訪嚴試優遇隆禮竝居詞科之上庶乎人篤自修而國有真才之用也嗟乎議者不乏行者最魁真舉弊于今殆甚于委地而滔天者矣曷不率由舊章哉